

Script of Morning Gojri News Bulletin 16 June 2025 at 1015Hrs

مارننگ گو جری نیوز بلیٹن مورخہ 16 جون 2025

LG Sinha

لیفٹنٹ گورنر منوج سنہا نے کہیو بے جے مضبوط سرحدی علاقہ ملک نانہہ محفوظ بنا رہیا ہیں تے صف اول غے طور ور ملک غو دفاع کر رہیا ہیں۔ یاہ گل انہاں نے پچھلے تہاڑے ضلع سانہہ غا گڑھا سلاتھیا مانہہ اک اڈ ٹوریم تے اسکول غی توسیع کاری غونی پتھر رکھن غی تقریب غے دوران اپنا خطاب مانہہ کہی۔ ایل جی موصوف نے پچھلا 5 بہراں غے دوران خطہ مانہہ ڈھانچائی تے صنعتی باندہ غی حصولیابیاں نانہہ اُجاگر کیو۔ انہاں نے قومی تعلیمی پالیسی 2020 غی بدلاؤ کُن اثرات نانہہ وی سراہیو۔ تے کہیو جے اس نال دیہی علاقہ توڑی معیاری تعلیم غی مساوی رسائی یقینی بن رہی ہے۔ تے ہزاراں غی تعداد مانہہ اسکول درمیان مانہہ چھوڑ چکا طالب علماں نانہہ فر تیں اسکول مانہہ واپس آئیو گیو ہے۔

CM JK Students

ایران مانہہ پیدا ہوئی کشیدگی غے پیش نظر جموں کشمیر غا وزیر اعلیٰ عمر عبداللہ نے یقین دوايو ہے جے جموں کشمیر غا طالب علماں غی بہبود تے اُن غی حفاظت سرکار غی اعلیٰ ترجیح رہ گی۔ اک سماجی میڈیا پوسٹ مانہہ وزیر اعلیٰ نے کہیو ہے جے انہاں نے خارجہ امور غا وزیر ڈاکٹر ایس جے شنکر سنگ گل کی بے جنہاں نے اُن نانہہ یقین دوايو ہے جے وزارت ایرانی حکام غا نیڑواں رابطہ مانہہ ہے۔ تانجے ایران مانہہ تمام بھارتی طالب علماں غی حفاظت نانہہ یقینی بنایو جا سکے۔ تہران، شیراز تے قوم مانہہ رہ رہیا طالب علم نگرانی مانہہ ہیں۔ جناب عبداللہ نے کہیو جے طالب علماں نانہہ واپس لیان بارے کوئی وی فیصلہ زمینی حقائق ور کیو جائے گو۔

Dy CM Nowshera

زمینی سطح ور نظم و ضبط نانہہ مضبوط بنان تے برائے راست عوامی رسائی نانہہ یقینی بنان غی اک کوشش مانہہ نائب وزیر اعلیٰ سریندر کمار چودھری نے پچھلے تہاڑے نوشہراہ غی پاٹھا پنچائیت مانہہ عوامی شکایات تے ازالہ کیمپ لوائو۔ کیمپ غے دوران مقامی لوکاں نے سڑک ڈھانچہ، پانی تے پانی سپلائی اور عملہ غی کمی جیسا معاملہ اُجاگر کیا۔ نائب وزیر اعلیٰ نے جائز مسائل کا فوری حل غو یقین دوايو تے موقع ور بی عہدیداراں نانہہ ہدایت جاری کیں۔ انہاں

نے زور دتو ہے جے وزیر اعلیٰ عمر عبداللہ غی قیادت آلی سرکار شفاف تے جواب دہ حکمرانی غی واعده بند ہے تے عوامی مسائل غو حل ترجیحات مانہ شامل ہے۔

CS Medical

جموں کشمیر مانہ صحت دیکھ بھال تے طبی تعلیم نانہ مضبوط بنان غی اک اہم پیش رفت مانہ چیف سیکریٹری اتل ڈلو نے سرکاری طبی کالجاں سنگ منسلک ہسپتالاں مانہ خدمات تے ڈھانچاں غو موثر جائزولیو۔ انہاں نے عملہ غی صورتحال، خصوصی کورس متعارف کران تے ایم بی بی ایس سیٹ بدھان غی مسعودہ غو وی جائزولیو۔ انہاں نے صحت خدمات غی توسیع کاری غی ضرورت ور زور دیتاں واں ویلے سران خدمات نانہ بدھان واسطے کہیو۔ جناب ڈلو نے کالجاں نانہ ہدایت کی جے وے عملہ غی تربیت، سامان غی خرید و فروخت تے ہنگامی خدمات نانہ مضبوط واسطے سکیمز تے سرکاری طبی کالج جموں تے سرینگر نال اشتراک کریں۔

Dharti Abha

قبائلی برادری غی بھلائی بہتری آلیے پاسے اک پہل مانہ جموں خطہ غی تمام ضلع انتظامیاں نے پچھلے تہاڑے دھرتی آبا جن جاتیہ گرامین اُتکرش ابھیان غے تحت اک بڑی بیداری مہم غی شروعات کرائی ہے۔ اس پہل غو مقصد قبائلی برادری نانہ سرکاری بھلائی بہتری آلی اسکیمیاں توڑی رسائی نانہ یقینی بنانو ہے تا نجے اُن نانہ با اختیار بنایو جا سکے۔ اس پہل غے تحت اخیری کونہ توڑی خدمات پجائی جائیں گی تے یاہ مہم پچھڑیا قبائلی علاقہ توڑی پُج غے اُن غی سماجی تے اقتصادی ترقی نانہ یقینی بنایو جائے گو۔

Tourists

لیفٹنٹ گورنر منوج سنہا غی طرفوں جموں کشمیر مانہ سیاحتی مقامات نانہ فرتیں کھولن غا فیصلہ تیں بعد لوکاں، مقامی قانون سازاں تے سیاحاں مانہ خاصی خوشی دیکھی جا رہی ہے۔ یہ سیاحتی جگہ حال ہی مانہ پہلگام مانہ ہوا دبشت گردانہ حملہ تیں بعد بند کر دتی گئیں تھیں۔ سیاحاں تے مقامی لوکاں نے اس فیصلہ غو خیرمقدم کرتاں واں کہیو ہے جے سیاحت خطہ غی معیشت تے روزگار واسطے کافی اہمیت غی حامل ہے۔

Prog Announcement

علاقائی خبراں آلا شعبہ آکاشوانی جموں غی طرفوں بین القوامی یوم یوگ غا سلسلہ مانہہ 20 منٹ غو اک خصوصی مباحثو نشر کیو جائے گو۔ یوہ پروگرام 18 جون 2025 بو قت سویر 7 بج غے 10 منٹ ور نشر وے گو۔ اس پروگرام مانہہ مہاری مہمان وین غی اک مشہور یوگ اچاریہ ڈاکٹر سجاتا ستھو جہیڑی مہاری زندگیاں مانہہ یوگ غی اہمیت بارے اپنا خیالات سانجھا کریں گی۔ اس مباحثہ غی میزبانی شروتی کھجوریہ تے کنال شریواتسو کریں گا۔ اسے طرح غی جانکا ری حاصل کرن واسطے میڈیم ویوو 303 میٹر یعنی 990 کلو ہرٹز تے ایف ایم 100 عشریہ 3 میگا ہرٹزور آکاشوانی جموں سنتا رہیو۔

Weather

موسم۔

جموں خطہ مانہہ پچھلا کجھ تہاڑاں تیں پے رہی شدید گرمی تیں لوکاں نانہہ کل شام اُس ویلے تھوڑی راحت ملی جد تیز بارش تے آندھی چکھڑ درج کیو گیو۔ موسم مانہہ اس تبدیلی غو لوکاں نے خیرمقدم کیو ہے۔ تے اس موسم غو خوب لطف چایو ہے۔ محکمہ موسمیات نے پیشنگوئی کی ہے جے اج پیشی ویلے کئی کئی مقامات ور ہلکی بارش یاہ طوفان چل سکے۔ 21 تیں 23 جون توڑی موسم عام طور ور آبر آلود رہے گو تے متی ساری جگہاں ور بارش تے طوفان غو وی امکان ہے۔
